

四經同卷

行六

佛說一切法功德莊嚴王經

佛說拔除罪障呪王經

佛說善夜經

佛說虛空藏菩薩能滿諸願最勝心陀羅

持本

尼求聞持法

佛說一切法功德莊嚴王經

唐三藏法師義淨譯

如是我聞一時薄伽梵在王舍城羯蘭鐸迦池竹林園中與大苾芻衆五百人俱菩薩摩訶薩千二百人皆得陀羅尼辯才無滯獲無梁智遊無礙境善權方便攝引衆生觀察世間心行平等饒益慈悲意樂純淨於諸佛所甚深妙法悉能諮問其名曰慈氏菩薩摩訶薩常勤勇菩薩摩訶薩平等住菩薩摩訶薩大慧菩薩摩訶薩無邊辯菩薩摩訶薩勇慧

菩薩摩訶薩觀自在菩薩摩訶薩除疑菩薩
摩訶薩如是等諸大菩薩摩訶薩而爲上首
并諸釋梵護世四天王龍神八部及諸外道
數有六千各將眷屬悉皆雲集此等大衆咸
至佛所禮佛足已右繞三匝雨妙天華奏天
音樂燒衆名香而爲供養爾時大衆咸作是
語善哉善哉如來教法具大威德有歸信者
能斷煩惱作是語已各坐一面爾時世尊入
能斷惑離垢三摩地入此定時大地即便六
種震動雨天細末微妙栴檀及妙天華在處

彌布放大光明周徧世界若諸有情墮惡趣
者蒙光得脫亦至一切天龍藥叉八部之衆
所居宮殿無不明照聞天音樂及天妙香彼
諸天神見不思議希有事已皆生是念誰作
如是殊勝神力令地大動雨天香華放大光
明照耀宮室作是念已互相告曰此是如來
現大威德非餘天等能有斯瑞我等今者應
往竹園詣世尊所禮拜供養聽聞妙法彼各
持天塤鉢羅華拘物頭華分陀利華蘇健提
華曼陀羅華摩訶曼陀羅華至世尊所頂禮

雙足而爲供養雨衆天華彌滿大地積至于
膝瞻仰尊顏合掌恭敬復有他方無量菩薩
及執金剛菩薩莊嚴王菩薩并萬億諸天持
呪神王見大光明各以威力作妙莊嚴香華
音樂來至佛所并諸眷屬皆繞三匝虔誠合
掌禮佛雙足爲供養已皆具威儀退坐一面
爾時慈氏等諸大菩薩見諸大衆皆雲集已
作如是念我觀大衆咸至佛所必當演說不
可思議殊妙之法咸皆寂慮佇聽微言是時
世尊知諸菩薩一切大衆心之所念即從定

起告莊嚴王菩薩言善男子汝今宜去觀此
大地何所見耶時莊嚴王菩薩承佛教已從
座而起即觀大地既徧觀已還至佛所禮佛
雙足在一面立白佛言世尊我承佛教觀此
大地所有人天一切大衆並皆雲集惟願慈
悲爲諸衆生作饒益事爾時佛告莊嚴王菩
薩言汝當一心聽我所說我今當與六十四
億有緣衆生授無上菩提記爾時執金剛菩
薩即從座起合掌向佛白言世尊今有無量
億數天龍藥叉及諸羅刹乾闥婆阿脩羅揭

行六

三

嚼荼緊那羅莫呼洛伽人及非人并諸外道
悉皆來集世尊今正是時惟願爲說一切法
功德莊嚴王經能消一切業障能滅一切罪
苦能斷一切魔業未信有情今生敬信除去
飢饉常得豐樂消諸疾病遠離枉死亦令有
情永除追悔悉得安隱常受快樂世尊我往
昔時曾於電光佛所聽受此經纔得聞已一
切妙法皆得現前一切惡道悉皆關閉所有
業障咸得消除惟願慈悲爲衆演說作是語
已世尊默然爾時執金剛菩薩亦復如是再

三慇懃勸請爲說佛告執金剛菩薩言善男
子女勿請我說一切法功德莊嚴王經何以
故我若說者於後惡世當有衆生不能信受
作如是語此經非是如來所說亦非讚毀此
經能招善惡二種之業然彼衆生爲慳貪故
不能恭敬供養是經於說法師亦不親近謗
毀是經廣興不信於現世中造衆惡業未來
之世墮地獄中受燒然苦善男子如此經王
深可尊重猶如父母復能滅除諸惡業障然
於五濁惡世非是說時亦非聽時何以故勿

當令彼一切外道及諸有情墮於地獄餓鬼
傍生長受諸苦然此衆生信心缺少樂著諸
欲勤營俗務販賣諍訟於此經典必起謗心
此等衆生命終之後墮八大地獄當受極苦
爾時衆中有八萬人俱從座起頂禮佛足白
佛言世尊我等深心信是經典尊重供養書
寫讀誦廣爲他說若有愚人不信此法由慢
法故亦當毀罵輕陵於我我於爾時悉皆忍
受報此經恩終無恨忿惟願爲說殊勝經典
所以者何此妙經王於當來世利益衆生如

行六

佛無異作是語已退坐一面執金剛菩薩白
佛言世尊云何菩薩摩訶薩求善知識佛言
善男子求善知識應當如是成就四法一者
數往請問二者起精勤心三者意樂清淨四
者尊重愛法執金剛菩薩白佛言世尊云何
菩薩住阿蘭若佛言善男子成就四法住阿
蘭若一者捨離俗家二者遠惡知識三者盡
捨財物四者常攝自心爾時觀自在菩薩白
佛言世尊我不見有聞此經人墮惡趣者世
尊此經有大威德難可思量世尊若有暫聞

此經禮拜讚歎供養恭敬獲無量福何況書
寫讀誦受持種種香華而爲供養及說法師
以衣食等而爲供養如是之人一切諸佛共
所護念爲其授記當得往生安樂世界如是
法師與佛無異佛言善哉善哉善男子我亦
供養如是法師亦爲授記當得生於安樂世
界速趣菩提若復有人於諸佛所及此經典
尊重恭敬以妙香華塗香末香衣服瓔珞種
種音樂幢蓋繒幡而供養者此人終無非時
橫死無有怨賊兵戰之怖亦無父母妻子眷

行六

五

屬朋友知識憂感之苦有所希求無不遂意
善男子諸佛出世其事甚難得聞是經更難
於彼若斯經典所在之處城邑聚落蘭若林
中及餘住處當知此地即是諸佛世尊之所
攝受爾時執金剛菩薩白佛言世尊觀自在
菩薩者以何因緣名觀自在世尊告曰常以
淨眼觀察世間所有衆生慰喻成熟慈悲利
益使得安隱若稱名者有所願求咸令滿足
以是因緣名觀自在復白佛言若有衆生但
稱觀自在菩薩名者尚得滿足所求之事何

況有人供養如來及此經典書寫讀誦廣爲
他說衣服香華而爲供養此人得福無量無
邊觀自在菩薩白佛言世尊此經大有威德
能作佛事惟願世尊更爲哀愍諸衆生故爲
說陀羅尼呪佛言善男子有陀羅尼名曰勝
妙我昔爲菩薩時於勝妙世界妙音佛所與
諸大衆共聞此陀羅尼呪既受得已證十地
法無量衆生悉皆獲得無生法忍爾時會中
諸菩薩衆皆從座起白佛言世尊惟願慈哀
憐愍我等說此陀羅尼呪爾時世尊以梵音

聲即說呪曰

怛姪他 逝也逝也 逝耶縛訶^上佉縛訶

逝也縛訶 忽魯忽魯鉢頭摩^引聲薛阿婆麼

梵謎薩羅薩唎泥^去聲地哩地哩地囉地哩提

婆頹鉢利波唎泥^去聲瑜陀唄多唎你鉢囉斫

羯囉你婆唎^{行六} 你脯唎也 婆伽梵^六 我名

某甲由佛加護一切所求咸願圓滿一切罪

業皆悉消除 莎訶

佛言善男子此勝妙陀羅尼呪能除一切罪
障能摧伏他軍永無飢饉疾疫災難病若之

事常能豐饒倉廩盈實增益壽命此陀羅尼
呪是諸佛母若有善男子善女人信心頂禮
恭敬供養書寫讀誦受持此經亦復供養持
經法師此人業障皆得消滅不遭橫死於現
身中常受歡樂父母妻子朋友眷屬悉皆安
隱所有願求無不遂意執金剛菩薩復白佛
言世尊我亦敬心持是經典若復有人以妙
香華并諸飲食供養此經及法師者我亦隨
喜同心供養此經在其國土王及諸人我皆
擁護令離衰惱所求遂願世尊我今發起勇

猛之心為彼國王及信受者亦為宣說陀羅
尼呪而為擁護佛言善男子汝能為諸衆生
利益安樂說陀羅尼我當隨喜爾時執金剛
菩薩以佛神力所加持故說此陀羅尼呪
南麼薩婆勃陀 怛他揭多喃行六 南麼阿彌
多婆也 怛他揭多也 南麼薩婆菩提薩
埵喃 南麼薩婆莫嚧地雞弊毘切也 怛姪他
虎呼謎虎呼謎末底 莫訶末底 跋折羅
末底 姪栗茶跋折羅末底 怛他揭多
阿奴鉢哩婆利帝 薩囉薩囉 阿瑜目企

苾哩俱擻 毗俱多目企 訖栗閉 訖

栗波鹿計 薩帝丁也阿奴颯末囉 薄伽

梵跋折囉波你 薩婆波跋羯麼賁也 我

某甲己名稱所有願求皆得遂意當與我願以

佛陀實語達摩實語菩薩實語聲聞實語

莎訶

世尊若復有人欲入菩薩地願見諸如來樂
生淨土及希富貴財寶豐盈無病延壽者應
當於此微妙經典及以法師書寫讀誦香華
妓樂衣服飲食繒蓋幢幡而爲供養如是之

人我當擁護所求願滿常起愛念猶如一子
世尊若復有人稟性癡鈍欲求聰明及護國
土令無疾疫者當於白月八日起首一日斷
食念誦此呪至十五日乃至月盡於中惟食
三種白食謂白飯乳酪清淨澡浴誦此神呪
滿十萬徧若有力者滿三十萬徧常可隨力
供養三寶次令畫師受八戒齋身衣淨潔而
畫其像於其鋪中安釋迦佛像處師子座作
說法儀右邊安觀自在菩薩以諸嚴具而莊
飾之於蓮華上立身有四臂右邊上手執梵

本經下手執數珠左邊上手執白蓮華下手
把君持左邊安執金剛神右手執金剛杵左
手遙承杵頭顏貌和悅瓔珞嚴身於其四邊
安護世四天王此等尊像皆以繒帶盛佛舍
利挾在身中次於像前可作一壇隨時大小
四面開門以牛糞塗拭種種香華散布其上
香鑪五具別然五香所謂沉檀蘇合安悉熏
陸於壇四門各安兩瓶或盛清水或復盛乳
燈盞十六隨處安置懸繒幡蓋及衆音樂香
水灑地香華飲食而爲供養於壇四角令人

行六

讀誦此經各各澡浴著鮮淨衣食三白食其
所爲人置華手中令彼合掌說所求事起慈
念心隨情發願以華散佛有所願者皆得從
心於七日中我當爲現殊勝相狀令見好夢
共其言語滿彼求心除不信者佛言善哉善
哉汝能愍諸有情說此呪法爾時觀自在菩
薩告執金剛菩薩言此妙經典難可值遇薄
福衆生於其國內雖有此經不能得見亦復
不能書寫讀誦聽聞受持何以故由有惡魔
爲障礙故復次善男子若有衆生書寫讀誦

此經典時有四惡魔而爲惱亂云何爲四一
者情生懈怠二者起不信心三者於法師處
不生尊重四者心不能定此人即應知是魔
事復有四種惡魔之業云何爲四一者遠離
善知識二者不如理作意三者不解文字四
者惟見現在言無未來造諸惡業心無怖懼
說無因果我說者是餘皆非法樂營俗務貪
染所纏如是衆生當墮地獄經無數劫受大
苦惱復次有四種魔云何爲四一者貪著財
物二者親近惡友三者障礙法師四者於法

行六

九

師說陳其罪過是等衆生由此業故當受貧
窮不見善友遠離尊師作邪見想說無因果
墮於地獄受諸劇苦佛告大衆我今再三實
言告汝勿爲放逸輕此經典一心信受莫生
誹謗爾時世尊欲重宣此義而說頌言

我曾宣說衆經王 令諸衆生得正覺
今更說斯真妙典 汝聞恭敬善修行
勿受當來極苦痛 墮在地獄經多劫
能於此經生信心 世世常爲我真子
又復供養此經者 當得生於淨土中

現無羅刹鬼神欺 亦無衆惡來侵擾
若此經王所住處 無諸灾厄能害人
所有求願悉隨心 安樂能至菩提岸

爾時四天王聞此頌已悲泣流淚舉身顫掉
禮佛雙足白言世尊我等四天王若見守持
此經法師我當供養彼說法時及諸聽衆皆
當覆護若有國王於此經典書寫讀誦受持
供養者我當擁衛及彼國人猶如一子亦以
衣服瓔珞而供給之今彼國界豐饒財寶無
所缺乏若戰陣時常令得勝念報佛恩我無

懈怠世尊若復有人聞此經典不生信心供
養法師者我於是人無有方便能爲救脫但
生憂惱佛言善哉善哉汝護正法能生如是
殷重之心爾時持國天王乾達婆主從座而
起頂禮佛足合掌恭敬白佛言世尊當來之
世有諸衆生常行不善不信如來於此經典
不能供養書寫讀誦亦不行施不信布施有
現世樂報世尊大慈爲如是等不信人故說
此經典今彼受行佛言善男子有二種事今
諸衆生墮大地獄生死輪迴一者婬欲二者

行六

十

瞋恚復有四法令諸衆生天人中云何爲
四一者於諸衆生心行平等二者於三寶所
起殷重心三者所有資生皆悉能施四者堅
持梵行無令有缺爾時世尊欲重宣此義而
說頌言

布施能有大威神 於三惡趣拔衆苦
衆生慳貪癡所惑 種種染欲惱其情
聞此經典不敬受 於佛法中無信施
捨身當墮於惡趣 當受無邊大劇苦
饒益國主及人民 我說斯經具威德

今離惡病衆邪惱 不被藥叉等所害
若有信經書寫人 供養能生無量福
一切衆生智如佛 多劫說福不能盡
若有經於多劫數 供養一切諸菩薩
不如於此妙經王 暫時信心書一字
持前功德比此福 行六 此爲億分不及一
是故智人於此經 一心奉行無懈怠
爾時觀自在菩薩白佛言世尊當來之世若
有善男子善女人於此經典深生敬信以妙
香華及諸飲食衣服卧具咸悉供養說法之

師及寫此經讀誦之者此人現世必當獲得
無量福利饒益其身離諸病苦眼等六根清
淨無患不遭水火飢饉厄難亦無惡毒之所
中傷一切有情見者歡喜命終之時見不動
佛來相慰喻告言善男子汝修善根其福無
量十方淨土極樂世界隨意受生爾時觀自
在菩薩白佛言世尊善哉善哉世尊為欲哀
愍瞻部洲中諸衆生故說此經典當來之世
廣作佛事利益衆生此大明呪能除一切極
重業障佛言善男子惡業衆生其罪深重不

聞此經不能書寫受持讀誦若有衆生聞此
經典書寫受持尊重供養當知皆是佛之威
神力故若復有人於此經典能爲他人說一
字者供養此人與佛無異何以故善男子此
經乃是過去七千諸佛之所宣說一切菩薩
悉皆隨喜諸天擁護是菩薩母爾時執金剛
菩薩白佛言世尊此之經典於未來世當於
何處具足流通佛言善男子此經當於海龍
王宮及三十三天皆具足有瞻部洲中但有
少分隨處流通佛言善男子我今以此經典

付囑於汝應當受持供養擁護與佛無異在
處流通勿令斷絕利益衆生廣爲佛事執金
剛菩薩白佛言世尊我今受佛教勅流布此
經亦復護彼持經法師佛言善哉善哉善男
子此實是汝所作之事復次觀自在菩薩白
佛言世尊我今至誠敬禮如是微妙經典於
行六
說法者及書寫人悉皆供養世尊若有薄福
之國無道君王設有此經不能供養及以法
師此經隱沒彼國當有災難惡事禍變現前
如是當知正法欲滅智者見已殷心供養佛

言善哉善哉善男子如汝所說假使有人滿
足千歲以種種樂具供養諸大菩薩及聲聞
衆數若恒河沙復以七寶同此沙數而爲布
施後捨自身善男子如是之福比於供養持
經之福乃至一句一字百千萬分彼不及一
何況盡能書寫讀誦何以故此經及呪有大
威力若受持者了身無堅如幻如夢知法無
我蒙佛授記得大菩提爾時大衆一切菩薩
及天龍藥叉阿蘇羅揭路荼人非人等皆共
一心同聲讚佛善哉善哉此是第二轉大法

輪我等悉皆恭敬供養此經所在國土城邑亦當擁護并說法者若有衆生謗此經者現身獲得無量重罪命終之後當墮地獄我捨是人^{行六}不爲擁護佛言善男子我今亦以經典付囑於汝當來之世廣爲宣揚勿令斷滅此經有大利益安樂人天增長福田離三惡趣^{十三}勿生疑惑常勸受持佛說此經時六萬四千人皆得無生法忍觀自在菩薩復白佛言世尊若有衆生信心書寫受持讀誦供養此經者此人命終當生何處得幾所福佛言善男

子汝能問此殊勝福事此人命終永離惡趣常生淨土假使有人行菩薩行捨頭目手足及以妻子亦復不如持此經典此經在處其地方所則爲是塔皆應供養觀自在菩薩復白佛言世尊當來之世持此經者我爲授記消滅五逆極重罪障九萬劫中常受富貴於八萬劫作轉輪聖王佛言如是如是善男子我憶過去無量劫時有佛世尊名無邊功德法智清淨星宿王如來我於爾時作婆羅門於彼佛所得聞此經受持讀誦得法眼淨其

同聽者從是已來不墮惡趣漸次當得無上
菩提善男子我於無量曠大劫中爲此法故
捨諸財寶頭目手足妻子城邑修淨梵行無
悔惱心汝等亦當如是修習是時大衆聞說
過去苦行之事咸皆泣淚白佛言希有世尊
當來之世有能受持讀誦供養此經典者得
無量福若有苾芻苾芻尼鄔波索迦鄔波斯
迦等於此經王不能讀誦陀羅尼呪不肯受
持亦復不能勤修六度於苦惱者無憐愍心
如是之人於無量劫墮生死海受諸苦惱善

男子譬如婦人身懷重孕乃至十月時此婦
人加諸病苦支節痠疼猶如刀解不能飲食
欲產之時受大劇苦作如是念我若免難永
不妊欲常修梵行纔產之後還行惡法便忘
先時苦切之患善男子當來之世愚癡衆生
亦復如是不信此經亦不讀誦布施持戒忍
辱精進修定修慧貪著俗情樂世間事不行
三業清淨之因此等衆生墮於地獄始生悔
心如懷孕婦人身遭極苦受苦惱已從地獄
出既得人身耽五欲樂其地獄苦不能記念

行六

十四

還造惡業善男子譬如有人多飲藥酒飲已昏迷不知家處佛法僧寶父母妻子曾不憶念無恭敬心由昏醉故遂往屍林險難之處亦無怖畏惶懼之心作如是念豈有天龍藥叉之類能怖於我如是醉人雖於此時委卧荆棘便生樂想醉醒之後心懷追悔自知非法言我從今乃至命盡更不飲酒作衆過失後遇惡緣還復耽飲同前造過愚癡有情亦復如是由貪染故多畜珍財作諸憍逸不念三寶棄背尊親亦不修行施戒忍等不欲希

求淨佛國土此等有情常處生死無涯海中當墮地獄長受衆苦設得爲人處胎之時受衆苦惱被苦逼身便作是念我若得免此厄難者更不作罪受斯極苦恒修善業願生淨土彼得人身由愚癡故作衆罪業還墮惡道

行六

十五

是故汝等當善修行勿爲放逸是我略之所教誡爾時具壽阿難陀白佛言世尊此經復有何名云何受持佛言此經凡有五名一名救一切衆生苦厄二名菩薩真實所問三名神通莊嚴王四名能成諸佛正覺五名一

一切法功德莊嚴王佛說是經已諸大菩薩及
聲聞衆天龍藥叉阿蘇羅乾達婆人非人等
皆大歡喜信受奉行

佛說一切法功德莊嚴王經

佛說拔除罪障呪王經

唐三藏法師義淨奉 制譯

如是我聞一時薄伽梵在淨居天上爲諸大
衆說微妙法是時曼殊室利菩薩摩訶薩於
大衆中即從座起偏露右肩右膝著地合掌

向佛瞻仰尊容目未曾捨白佛言世尊此大
法門甚深微妙實爲希有然於當來五濁世
時惡業衆生具貪恚癡欺誑不信樂行非法
不修戒品專行詭僞彼於呪法所有威力神
通變現於諸國土隨其方處求者獲益功德
成就念誦儀軌祭祀法式皆不信受亦不依
行謂非佛說而爲謗毀惡障纏心即便命過
墮大地獄受極苦惱無有出期世尊此等衆
生旣遭大苦云何救護惟願慈悲救濟今出
爾時釋迦牟尼如來即便舒手摩曼殊室利